

ما رنینگ گو جری نیو ز بلیٹن مو رخہ 23 ما رچ 2025

LG Filmostav

لیفٹنٹ گو رنر منوج سنہا اچ توی فلم اُتسو غو افتتاح کریں گا۔ یوہ پروگرام جموں کشمیر سنے ایسو سی ایشن (جے کے سی اے) غی طرفوں ابھنو تھیٹر جموں مانہ منعقد ہو رہیو ہے۔ آکاشوانی جموں غا نمائندہ نے رپورٹ ٹوری ہے جے اس پہل غو مقصد جموں کشمیر مانہ فلم سازاں، فنکاراں تے تخلیقی پیشہ وراں مانہ اپنی صلاحیت غو مظاہرہ کرن واسطے متحرک کرنو ہے۔ توی فلم اُتسو غی افتتاحی تقریب مانہ بُنر ادب اور تعلیم غا شعبہ تیں کئی لوک حاضر ویں گا۔ اس سلسلہ مانہ جموں کشمیر ثقافتی اکیڈمی جے کے سی اے غی طرفوں ججاں غی اک نمایاں ٹیم مقرر کی گئی ہے۔ جھپڑی تمام زُمران غی پرکھ کرے گی۔ اس سلسلہ مانہ نتیجاں غو اعلان اچ ہی کیو جا ئے گو۔ اس ضمن مانہ پہلا نمبر ور آن آلاں نانہ 10 ہزار روپیہ غو انعام دتو جا ئے گو۔ جد کہ اُس تیں بعد آلا نانہ 7 ہزار روپیہ اور تیجا نمبر ور آن آلا نانہ 5 ہزار روپیاں غو انعام دتو جا ئے گو۔

Speaker House Committee

جموں کشمیر قانون ساز اسمبلی غا اسپیکر عبدالرحیم راتھر نے کل جموں کشمیر مانہ جل جیون مشن (جے جے ایم) غی عمل آوری غا سلسلہ مانہ مبینہ بے قاعدگیاں غی پڑتال کرن غی خاطر اک ہاؤس کمیٹی بنان غو اعلان کیو۔ اُنہاں نے کہیو جے بجٹ اجلاس شروع ہون تیں ہی کُجھ قانون سازاں غی لگاتار اک مانگ رہی ہے جے اس ضمن مانہ اک ہاؤس کمیٹی بنائی جا ئے، تانجے مبینہ بے قاعدگیاں غی پڑتال کی جا سکے۔

Ropeway Amarnath

سرکار نے اچ کہیو ہے جے 3 ترقیاتی روپ وے غا سلسلہ مانہ تفصیلی پروجیکٹ رپورٹ ڈی پی آر ایس تیار کرن غی خاطر بولی لان واسطے دعوت دتی گئی ہے۔ ان روپ ویز مانہ 11 عشاریہ 6 صفر کلو میٹر بالتال تیں 3 ہزار 8 سو 80 میٹر اُچی پو تر امرناتھ گُفہ تک غو روپ وے شامل ہے۔ تانجے یا تریاں غی سالانہ نقل و حرکت غے دوران آسانی پیدا کی جا سکے۔ آکاشوانی جموں غا نمائندہ نے رپورٹ ٹوری ہے جے اس تیں علاوہ قومی شاہراں با رے لا جسٹکس لمیٹڈ این ایچ ایل ایم ایل غی طرفوں وی 3 ہو ر روپ وے پروجیکٹاں غا سلسلہ مانہ دعوت دتی گئی ہے۔ جن مانہ 2 پروجیکٹ بڈگام جد کہ 1 ضلع رام بن واسطے ہے۔ یاہ جانکاری وزیر اعلیٰ عمر عبداللہ غی طرفوں قانون ساز اسمبلی مانہ اک تحریری جواب مانہ دتی گئی۔ وزیر اعلیٰ نے کہیو جے جموں کشمیر مانہ 52 روپ وے پروجیکٹاں غی اک فہرست ترقی واسطے ہتھ مانہ لی گئی ہے تے سرکار غی طرفوں سانجھی کی گئی تھی۔

Martyrs Day

قوم 3 بہادران نانہ بہارت غی جدو جہد آزادی غا سلسلہ مانہ انقلابی بہادری واسطے خراج عقیدت پیش کر رہی ہے۔ ان بہادران مانہ شہید اعظم بھگت سنگھ، شو رام راج گرو تے سُخدیو تھاپڑ شامل ہیں، جنہاں نانہ 1931 مانہ اج غے دن لاہور جیل مانہ پھانسی دتی گئی تھی۔ ان بہادر مجاہدین آزادی نانہ انگریز پولیس غا افسر جے پی سُندرس نانہ 17 دسمبر 1928 نانہ لاہور مانہ قتل کرن غا الزام مانہ موت غی سزا سنائی گئی تھی۔ ان عظیم قربانیاں غی یا د مانہ بہارت مانہ پر بہرے 23 ما رچ نانہ یوم شہا دت منایو جائے۔

Udhampur Nasha Mukth

نشہ مُکت ابھیان غے تحت سرکاری آئی ٹی آئی کالج اُدھم پور مانہ اک روزہ بیداری پروگرام منعقد کیو گیو۔ یوہ پروگرام سماجی بہبود محکمہ نے پولیس محکمہ اور کھیڈاں با رے محکمہ غا تعاون نال منعقد کیو۔

Ramban HADP

ضلع رام بن مانہ باغبانی سیکٹر ترقی کر رہیو ہے، تے یوٹی غی معیشت غا با بدہ واسطے اک روشن مینار غے طور ور وجود مانہ آوے لگو۔ اس سلسلہ مانہ ذرعی پیداوار محکمہ رام بن نے اک وسیع پروگرام ایچ اے ڈی پی یعنی مجموعی ذرعی ترقی پروگرام شروع کیو ہے۔

CS Kala Kendra

چیف سیکریٹری اتل ڈلو نے کل اعلان کیو جے کلا کیندر نانہ جموں کشمیر مانہ بصری بُنر غا سلسلہ مانہ اک بڑا مرکز غے طور ترقی دتی جائے گی۔ اُنہاں نے شناخت با رے ثقافت نانہ ترجیحات بنان غا سلسلہ مانہ سرکار غو عزم دُہرایو۔ ویں کلا کیندر جموں مانہ بُنر با رے نمائش مانہ بول رہیا تھا۔

PM MKB

وزیر اعظم نریندر مو دی آکاشوانی ور 30 ما رچ نانہ من کی بات پروگرام غے دوران ملک تے بیرون ملک رہن آلا بھارتی شہریاں سنگ اپنا خیالات سانجھا کریں گا۔ ماہانہ ریڈیو پروگرام غی یاہ 120 ویں قسط وے گی۔ لوک مفت فون نمبر ور فون کر غے اپنا مشورہ دے سکیں۔ اس سلسلہ مانہ فون نمبر اس طرح ایس 1800117800۔ اس تیں علا وہ نریندر مو دی ایپ یاہ ما ئی گوو اوپن فورم ور وی لوک اپنی گل کہہ سکیں۔ آتا من کی بات پروگرام واسطے لوکاں غی صلاح 28 ما رچ تک لی جائیں گی۔ مذکورہ پروگرام آکا شوانی تے دور درشن غا تمام چینلاں تیں نشر وے گو۔ یوہ پروگرام اے آئی آر نیوز ویب سائٹ تے نیوز آن ائرمو با ئل ایپ ور وی چلے گو۔ اس تیں علا وہ اے آئی آر نیوز، ڈی ڈی نیوز، وزیر اعظم غا دفتر تے اطلاعات ونشریات وزارت غا یو ٹیوب چینلاں ور وی من کی بات پروگرام چلے گو۔
